



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Nüngdakba oset balala bener truck 300 dak tema Gaza-i iogo

Danielle Collins-i WTA Charleston Open kokogo



VOL. XXI ISSUE NO. 176 (ADOK 176) DIMAPUR SANGTENNÜ (TUESDAY) RONGCHII (APRIL) 09, 2024 ₹ 5.00

Dimapur nung Aor Reverend-tem sarasadema jajatsü

Dimapur, April 08 (TYO) : Dimapur Area Aor Ordained Minister Fellowship (DAAOMF) sarasadem sentong ka DABA nung April 9, 2024 anepdang 6:00 AM nungi 10:00 AM tashi agir külen kasa anogo nung Commissioner of Police, Dimapur office kima 11:00 AM nung aser Deputy Commissioner, Dimapur office kima 12:00 ako nung agitsü sentong renema lir. Iba sentong nung anepdang 6:00 ako nungi 10:00 ako tashi nung shilem agitsü purtemji Rev. T. Mayang Pongen, Rev. Imly Jamir, Rev. Dr. A. Wati Jamir.

Rev. I. Toshi Jamir, Rev. Toshimeren, Rev. T. Ariba Imchen, Rev. T. Lima Ozüküm aser Rev. O. Yashi Jamir nungertem alitsü. Kasa anogomung sentong nungsa Commissioner of Police office kima Rev. Dr. L. Kari Longchari o jembir sarasademtsü aser DC Dimapur office kima Rev. Dr. Lima Jamiri o jembir lokti külemi sarasademtsü. Iba sarasadem sentong ya tongtibangsa tan aruya aliba parliamentary election dak rangloker ayonger ta parnok lenirtemi metetdaksüogo.

NDPP president Chingwang-i tatok meshir

Dimapur, April 8, 2024 (TYO): Konyak Union lenisüba kübok Konyak Civil Society Organisations-i Nationalist Democratic Progressive Party (NDPP) president N Chingwang Konyak jaokba sülen anogo ka lir pai tatok meshiogo. April 5 nü Wokha nung election rally ka nung Chingwang Konyak-i Eastern Nagaland People's Organisation (ENPO)-Frontier Nagaland Territory (FNT) indang onük jembiba atema KCSOs-i pa jaoka liasü. Pai jembiba onükji Konyak

Union-i March 30 bangzüng den meputep liasü aser iba atema tatok meshir ta NDPP president-i ashi. "Ni aibelenba ajanga timtem bentsür aruba angatetogo aser tarutsü nung iba ama meinyaktsü. Tarutsü nung kü nija mesüra NDPP president ka ama ENPO-FNT onük mejembitsü" ta Chingwang-i Konyak Union tsüngdang nangzükogo. Paisa Eastern Nagaland aser Konyak nung asoshi maneni shilem agitsü aser tajungtiba agüja inyaktü nangzükogo.

NPCC-i 'Donate for Congress campaign' tenzüker

Dimapur, April 8, 2024 (Agencies): Nagaland Pradesh Congress Committee (NPCC)-i Hombarnü 'donate for Congress campaign' tenzüker aser iba ya Lok Sabha election nung INC & INDIA consensus candidate S Supongmeren Jamir nüboyimba maparen atema lir. Centre sorkari Congress Party indang bank accounts sota ayuba ya party kati party ka anema inyakba dang masü saka India sensosanger democratic temetentem nung kongshiba lir, ta Communications Department,

NPCC-i sangdong ka nung ashi. "Donate for Congress campaign" ya senotsü lenmang bushiba dang masü saka Nagaland nung vote enoktsürtemi tim masüba inyakyim magizüker ta sayutsü aser Constitution kübok democratic maparen timi inyaksangshia aotsü ola agütsüba inyakyim ka lir, ta NPCC-i ashi. NPCC-isa Congress Party pusemertem aser meimertem den Nagaland nung tangatetba shitak aliba senso shia dang election tiptema agitsü asoshi mulungsoa tenlatsü mepishia metetdaksüogo.

Dimapur nung postal ballot mapa tenzüker



Dimapur Deputy Commissioner office nung essential worker kati Postal Ballot ajanga vote enoktsüba angur.

Dimapur, April 8, 2024 (TYO): April 8, 2024 nungi Dimapur Deputy Commissioner office nung essential workers atema postal ballots nung vote enoktsüba maparen tenzüker. Iba maparen ya EAC aser Nodal Officer for Postal Ballots Litsenthung Kikon ketdangsuba kübok inyaker.

Postal ballots nung vote enoktsüba mezüng anogo nung essential voters 18 nungi 15-i votes enoktsüogo ta Litsenthung-i ashi. Deputy Commissioner Office, Dimapur nung April 10, 2024 tashi anepdang 9:00 ako nungi nikongdang 5:00 ako tashi postal ballot voting alitsü ta paisa ashi.

NSDF-i election manifesto nung PwDs asoshi policy enoktsü ashir

Kohima, April 8, 2024 (TYO): Nagaland nung Lok Sabha elections atema election manifesto balala nung persons with disabilities (PwDs) atema policy tem enoksemang ta Nagaland State Disability Forum (NSDF)-i metetdaksüogo. NSDF-i iba temepishiba ya political party aser candidate ajak dang ashir. General Elections 2024 agitsü aliba atema National Disability Network (NDN) aser National Committee on Rights of Persons with Disabilities (NCRPD) ajanga 'Manifesto: For and by Citizens with Disabilities' sayaogo ta NSDF president Vikengunu Fatima Kera-i ashi. Nagaland nung PwDs 29,361 lir aser Chief Election Officer Nagaland-i electoral roll nung PwDs 6,707 zülua aliba shiogo ta lai ashi.

Linük jenjang nung PwDs atema teloktemi manifesto adokba NSDF-i pusemer aser political party ajaki onok asoshi bilemstüla ta Vikengunu-i ashi. Political party aser candidate temi onoki akhangba onüktem rongnung 10 ter bosa agizükdaktsünür. Takhangbatem rongnung budget nung disability atema 5% lezmüksütsü, PwDs ajak nem health insurance policies agütsütsü, public aser private buildings agütsütsü, public transportation facilities & communication systems agütsütsü onüktem dena lir ta NSDF-i NDN aser NCRPD den külemi metetdaksüogo. "Onoki one nation one pension tangatetba nung Rs ita shia 5,000 agüja social security agütsütsü, lokti aser yimtenren nung dendaktsütsü, small, large

& medium scale enterprises nung mapa agüja rongsenketzüng maparen nung shilem agitsü, para athletes atema sports infrastructure aser 2029 tashi nung National Average den liromedema children with disabilities anioktsü akhanger" ta NSDF General Secretary, Ashe H Kiba aser joint secretary Ngaugongbe natia ashi. NSDF-isa Nagaland nung Lok Sabha election nung candidate ajak den ajurutepa parnok takhangba onüktem lemsateptsü metetdaksüogo. Election Commission of India-i persons with disabilities pur registration aser vote enoktsütsü indang mapa inyakdar. Iba ajanga election maparen nung persons with disabilities densemstü aser shilem agitsü imlar, ta Ashe H Kiba-i ashi.

PDA-i Naga maitsü aser tamangba yimsü kümzüka ayutsü: CM Rio

Kohima, April 8, 2024 (TYO): Peoples' Democratic Alliance (PDA)-i Naga maitsü aser tamangba yimsü kümzüka ayutsü ta Chief Minister aser NDPP lenir Neiphu Rio-i nangzükogo. PDA consensus candidate Dr Chumben Murry atema Party Central Office nung coordination meeting ka nung CM Rio-i iba ya ashi. "Nagaland nungi Lok Sabha menden ka atema candidate 3 lir. Parnokji Congress candidate S. Supongmeren Jamir, Independent Hayithung Tungoe Lotha aser PDA consensus candidate Dr. Chumben Murry nung lir. Ajisiaka nübertemi candidate koba shimtsü meratai dang Dr. Chumben shimtsüla" ta pai ashi. "Independent candidate jenjangmong kecha mali aser Nagaland state assembly nung MLA ka danga meliaka Congress-i candidate ka toktepaktür saka NDPP candidate Murry bo MLA 60 prongi pusemer" ta Rio-i ashi. Congress-i Centre nung kümzüka ana (2004-2014) inyakang Nagaland atema kecha meinyaktsü saka 2003 nung BJP sorkari lezmüksüba Railway aser Four Lane Dimapur-Kohima road mapatongtem atema senotsü agütsüba anen. 2008 nunga Congress sorkari Nagaland nung President's Rule benok, ta pai metetdaksü.

"NDPP ya BJP den teyariteper ka lir aser onoki nübo agi tangar memenepertem aseer Khristantem temeten atema maneni noktaksü. Nagaland ya rongsen peria manguba state ka lir aser Centre sorkar dak dang metaloker arur. Külen Naga yimten tebilemstü aser tanga khuretem lir" ta Rio-isa ashi. Tim masüba inyakterem alitsü saka sorkar indang welfare policy tem kanga tajung lir. Talisa PDA züngsemtemi Naga nung tamangba yimsü aser maitsü lendongi meidaktsütsü aser Khristantem ama inyaktü ta paisa shisem. PM Narendra Modi ya mangdang aliba lenir ka lir aser pai teti nisung ajak asoshi kasa terenlok atema inyaka arur. BJP-i Centre nung Lok Sabha menden 300 tema aser NDA ajanga 400 tema takok angutsü meranger. Ajisiaka Congress jenjang kanga majung aser INDIA Bloc ya loksaa aotsü tia ka nung lir, ta Rio-isa ashi. CM Rio-isa PDA züngsem 60 NDPP - 25, BJP - 12, NCP - 7, NPP - 5, LJP (Ram Vilas), Naga People's Front (NPF) & RPI (Athawale) - 2 each, JD(U) - 1 aser Independent 4 den Party lenirtem aser züngsemtemi election nung takok angutsü atema meranga inyaktü ayongzükogo. Parliament-i aotsü maongka ngura Nagaland nung yimjung, terenlok aser tejakleni aotsü asoshi inyaktü nangzükür ta PDA candidate Dr. Chumben-isa ashi. NDPP ya BJP den teyariteper ka, Khristan aser nübo agi tangar memenepertem aser Khristantem anema inyaker ta Nagaland nung Congress-i osang prokshiba osang karbo shitak asütsü akok saka osang karbo sorkar anema olulutem lir, ta CM Rio-i ashi.

lir" ta Dr. Chumben-i ashi. "Asenok ya Hindu nung linük ka nung alir aser nisung ajak tamajung masü. Parnok rongnung nisung kar dang nübo agi tangar memenepertem anema lir. Asenoki Hindu nung nisung tajungtem tangatetba agizüksüla aser temelenshi bener arutsüla" ta paisa ashi. Parliamentary Christian Forum ajanga ni nübo agi tangar memenepertem asoshi ola adoktsü. BJP den teloktep nungi süaka ni regional candidate ka lir, ta Dr. Chumben-isa ashi. Naga yimjung olemtep mapang talangka atsülanga arur saka kümzüka tasenba ya Naga yimten latettsü asoshi kanga tongtipang asütsü ta paisa shisem. "NPF-i consensus candidate nem vote enoktsütsü. Onoki divisions ajak dang Dr. Murry nem takok tulu ngudaktsütsü atema tetuyuba agütsüogo" ta NPF MLA Kuzholuzo Nienü-i ashi. MLA 60 longjemba ya Naga yimten latettsü atema lir. Mapang talangka mekoktetü aruba Naga yimten ken o angatetteptsü atema iba election nung shilem agir ta pai ashi. Modi'er sorkari maneni yimsü asütsü aser iba ajanga Naga yimten latettsü ta BJP MLA & Prisons and Printing & Stationery Advisor Kropol Vitsu-isa ashi. BJP ya secular party ka lir aser Khristan mesüra tanga minority party anema menokdaker, ta Kropol Vitsu-isa ashi. Modi'er sorkar maneni arudang Nagaland nung alirtemi opposition MP ka yokbaji tamashi mapa ka asütsü ta NPP MLA Dr Tsielhoutuo Rhutso-isa ashi. Independent MLA Kevipodi Sophie-ia independent MLA ajak tenüng nung consensus candidate yaritsü osang metetdaksü.

Dimapur Sardar Sumi GB temi Advisor Tovihoto Ayemi den senden amen



Advisor H. Tovihoto Ayemi aser Dimapur Sardar GBs' Kuqhakulu züngsemtem Deobar nikongdang ajurutepba mapang tangokba noksa ka yangi angur.

Dimapur, Rongchii/April 08 (TYO): Dimapur Sardar Sumi GBs' Kuqhakulu ajanga Deobar nikongdang Advisor, Tribal Affairs & Election Department, H. Tovihoto Ayemi den ajurutepa Dimapur terenlok asoshi ken o balala jembia liasü.

Sumi nung GB tem den jembidang, GB tem ya tashi tai aser ajaki rangloka aliba nisungtem lir aser nürburtem mesüra colony ajungtsü atema teinyaktsü jenti lir, anungji GB

ajaki temlung agüja pei mapa inyaktsüla, ta Tovihoto-i ashi. Pai Gb tem dang nürburtem ajangzüaktsü atema teka amteper inyaktsü ajungshi aser tarutsü nung nürburtemi GB tem ajungba indang jembitsüsa alitsü ayongzüak.

Lenirtem tsungta telungjem mali aser pei kisung alir ama yimya amshira, lokti kodanga tejakleni maotsü, ta Advisor Tovihoto-i ashi.

Tang aruya aliba

parliamentary election dak sendakba nung jembidang, state dangi terenlok maparen tali-tali bener arutsü mechi CM Neiphu Rio-i aniba PDA sorkari meranga inyaker, aser iba yongji PDA nungi Centre nung Naga nung asoshi jembitsü atema PDA nübu ka alitsü tim, ta Advisor-i ashi.

Anungji nenoki kanga jeretpereta PDA candidate Dr. Chumben Murry nem vote agütsütsüla, ta pai ajungshia liasü.

DC Dimapur-i AROs, Nodal Officers tem den senden amen

Dimapur, Rongchii/April 08 (TYO): Aruya aliba 18th Lok Sabha Elections tajungtiba nung agitettsü mechi Deputy Commissioner aser District Election Officer, Dimapur, Dr. Tinojongshi Chang, NCS ajanga AROs aser Nodal Officers tem den April 6, 2024 nü senden ka mena district nung election agiba mapang koda masü timtem ajurudang mera balala agitsü atema sensaksema liasü.

Election maparen nung dena aliba administrative bodies aser stakeholders tem tsungta amalitep kadaktsütsü nükjidong nung iba senden ya ayongzüak, ta DC Dimapur-i ashi.

Election takok ngua agitettsü atema sentong kanga junga atongtsü nüngdaker aser amalitep akatsüla, ta pai ashi.

Iba senden nung election ketdangsüba, security arrangements, voter awareness campaigns, aser logistics amala indang tejangja jembia liasü. Nodal Officers aser AROs tem mapa indanga iba senden nung abensa jembia liasü.

Iba senden nung Assistant Election Officer, Toshimongba Longchar-ia absentees voters tem asoshi postal ballots ya April 8-10, 2024 anogotem agitsü, ta metetdaktüsü.

Kasa mapang ki sema absentee voters tem vote bendena aotsü, ta ashi.

Electronic Voting Machines (EVMs) tem commissioning asüba mapanger April 8 & 9, 2024 anogotem anepdang 9:00 ako nungi tenzüka Deputy Commissioner, Dimapur indang

office nung agitsü aser election maparen tajungtiba nung achayangtsü aser reprangshimtsü atema Control Room ka lapokogo, ta pai metetdaktüsü.

Dimapur, Niuland aser Chümoukedima atema phase tasembuba training ya April 15, 2024 nü agitsü, ta ashi.

Model Polling Stations aser tetsür polling officers temi ketdangsüba polling station tem amenoktsü. Voters temi metetnüba angajemdaktsütsü asoshi Voters Facilitation Centre ka amenoktsü, ta paisa ashi.

Iba senden nung Dimapur-I, Dimapur-II aser Dimapur-III Assembly Constituency tem nungi Assistant Returning Officers (AROs) aser Nodal Officers ajak dena liasü.

Dimapur nung Lok Sabha elections atema webcasting training agütsü



Dimapur Government College nung April 8, 2024 nü Lok Sabha Elections ketdangsür nem webcasting training agütsüba mapang tangokba noksa nung angur.

Dimapur, Rongchii/April 08 (Agencies): Aruya aliba Lok Sabha elections tajungtiba nung agitettsü mechi Dimapur nung operators atema webcasting training ka April 8, 2024 nü Dimapur Government College, Dimapur nung ayongzüka agia liasü.

Master Trainers Imnatoshi aser Imnajongshi nati anir iba training ya operators nem hands-on experience agütsütsü

nükjidong nung agia liasü. Training nung Dimapur nung aliba polling station 87 awajema liasü.

Dimapur nung polling stations 87 aliba nungi webcasting training ya polling station 77 atema video aser online platforms ajanga agia liasü. Iba den kümlemi tanungba polling stations toku atema offline training agüja liasü.

April 9 nü mock drill ka

Dimapur nung aliba polling stations shilem 20 nung agitsü lir. Ibai asangsang nung amai agitsü aser tarutsü nung election agitsü aliba mapang polling station ketdangsürtem renema aliba tendangtsü asoshi lir.

Mezüngbuba mock drill ya agiba sülen tanabuba round ya April 12, 2024 nü agitsü sentong lir aser iba mapang Dimapur nung aliba polling station shilem 50 awajemtsü.

Dimapur nung absentee voters atema postal ballots tanü nungi agütsütsü

Dimapur, Rongchii/April 08 (TYO): Arishi küm 65 nungi tema teintet rogotem aser lemta-matar tem vote agütsütsü temeden ayong-ayonga amshitetsü mechi absentee voters atema postal ballots ya April 9, 2024 nü tenzüaktsü, ta Litsenthung Kikon, EAC aser Nodal Officer for Postal Ballots, Dimapur ajanga sangdong ka nung metetdaktüsü.

Anepdang 9:00 ako nungi tenzüaktsü aser April 10, 2024

tashi iba maparen inyaktsü. Iba mapang Dimapur nung absentee voters 179 indang vote bendentsü, ta Kikon-i ashi.

Item voters tem tonga otettsü mechi Dimapur I, II aser III mapang kasa nung ayimjemtsü atema team toku (9) tenteta lir, ta pai ashi.

Parnok ya ki tonga aotsü aser temsüa aliba absentee voters tem timtem majurui postal ballot ajanga pei vote agütsüdaktüsü, ta paisa ashi.

Junior Red Cross mapa nung aniokba sentong agi



Dimapur, Rongchii/April 08 (TYO): Junior Red Cross mapa nung aniokba sentong ka Indian Red Cross Society Kohima District Branch ajanga April 8, 2024 nü ayongzüka agia liasü. Iba sentong ya Coraggio School, Lerie aser Public School Dzuwuru, Kohima atema pei school sasep nung agia liasü.

Junior Red Cross züngsemtem atema Kuoliebeizo Mepfhuo, Member managing committee, IRCS, Khoima District Branch ajanga tenangzüktep ketdangsüa agi aser Thehiechulie Louis, Honorary Secretary, Indian Red

Cross Society Kohima District Branch ajanga Indian Red Cross Society aser Red Cross movement indang onük nung ajemdaker jembia liasü.

Paisa Junior Red Cross züngsemtem mapa aser teinyaktsü indanga rateta ashi.

Iba sentong nung headmistress aser school ketdangsürtem nungia jembia liasü. Iba sentong ya Santu Thapa, Joint Secretary, Indian Red Cross Society Kohima District Branch lenisüba kübok agi aser Teacher Counsellors ajanga melepzüng o jembia liasü.

Dimapur nung EVMs, VVPATs commissioningsüogo



Deputy Commissioner, Dimapur indang office nung April 8, 2024 nü Strong Room lapokba mapang tangokba noksa ka nung DC & DEO Dimapur, Dr. Tinojongshi Chang den ketdangsürtem aser political party balala nungi züngsemtem angur.

Dimapur, Rongchii/April 08 (TYO): Aruya aliba 18 Lok Sabha election atema Electronic Voting Machines (EVMs) and Voter Verifiable Paper Audit Trail (VVPAT) machine tem commission asüba aser renemshiba sentong ka Deputy Commissioner, Dimapur indang office nung April 8, 2024 nü agia liasü.

Political party ajunga nungi teshimtet nisungtem, candidate tem tenüng nung arurtem, Assistant Returning Officers (AROs), Vineikho Tetso, Returning Officer & Nodal Officer for EVM/VVPAT,

Dimapur; Toshimongba Longchar, Assistant Election Officer, Dimapur; Yanthungbenmo Kikon, SDO (Civil) & Nodal Officer for transport aser Dr. Tinojongshi Chang, NCS, Deputy Commissioner & District Election Officer, Dimapur nungertem lia Strong Room lapoka liasü.

EVM/VVPAT tem commission asüba maparen ya maneni April 9, 2024 nüa anepdang 9:00 ako nungi tenzüka Deputy Commissioner, Dimapur indang office nung agitsü.

Kejriwal-i mepishiba ken o nung Delhi HC-i obendang agütsütsü



April 08, 2024 nü New Delhi nung AAP lenirtem- Sanjay Singh, Gopal Rai, Sandeep Pathak aser Pankaj Gupta nungeri osangbenertem den jembidang tangokba noksa nung angur.

New Delhi, Rongchii/April 08 (Agencies): Delhi excise policy ken o dak sendakba nung tang Tihar jail nung puoka alisang Delhi Chief Minister, Arvind Kejriwal-i temepishiba ken o ka benoka lir; Mongolbarnü Delhi High Court-i iba temepishiba dak sendakba nung obendang agütsütsü.

Delhi high court indang website nung shia aliba agi, Mongolbar nikongdang 2:30 ako nung Justice Swarana Kanta Sharma-i obendang agütsütsü.

Kejriwal-i pa apuba anema temepishiba ken o agütsüba den

külemi pa Enforcement Directorate ket nung ayuba anema ken o benoka lir. Iba sülen pa Judicial ket nung ayu aser tang tesüsa Tihar jail nung puoka lir.

AAP tongti lenir Kejriwal-i tang ama election mapang ka nung Enforcement Directorate (ED)-i pa apuba ashishir.

Election agitsü mongpu ka nung pa apuba ya democracy aser election timi agiba densema linük temzüng nung aliba telatetbatem den mapet, ta pai metetdaksü.

ED-ibo Kejriwal

temepishibaji ashishia, election agitsü mapang ana nung aputsü makok, ta Kejriwal-i ashitsü makok, kechiyong ozüing kübok ajak kasa züngshir, ta ashi.

March 21 nü ED-i Kejriwal pua liasü aser April 1 nü pa judicial ket nung agütsü.

2021-22 kümsük nung Delhi nung AAP sorkari benokba excise policy nung senotsü tsütsü ochimashi liasü aser sübokrem agi, ta tai tonglokja ken o benokba sülen iba ken o bushisüngdangba dak sendakba nung Kejriwal dak alia AAP lenirtem aika puogo.

Trinamool Congress lenirtemi Central agencies anema longkak ait

New Delhi, Rongchii/April 08 (Agencies): Hombarnü New Delhi nung Trinamool Congress (TMC) lenirtemi Election Commission of India (ECI) indang office kima mener longkak aitba mapang nung police-i party lenirtem aika puogo.

Trinamool Congress züngsemtem jagi Enforcement Directorate (ED), Central Bureau of Investigation (CBI), National Investigation Agency (NIA) aser Income Tax department nung tekolakpurtem melentsüla, ta takhangba agüja longkak aita liasü.

Trinamool Congress nungi Derek O'Brien, Dola Sen, Saket Gokhale aser Sagarika Ghose nunger densema lenir teri Election Commission ajurua takhangba agüja liasü.

Election Commission of India indang office kima osangbenertem den jembidang Dola Sen-i, "Onoki Election Commission dang jagi Enforcement Directorate (ED), Central Bureau of Investigation (CBI), National Investigation Agency (NIA) aser Income Tax department nung tekolakpurtem melentsüla ta takhangba agütsüogo. Onoki iba takhangba agüja ghonda 24 mener longkak aiter," ta metetdaksü.

Tesülen Delhi Police-i Dola Sen den TMC lenirtem kar pua liasü.

West Bengal Chief Minister, Mamata Banerjee-i aniba TMC party-i, Centre nung BJP sorkar tetuyuba kübok central agency temi opposition party tem anema inyaker, ta aitsür.

Kolkata airport nung osangbener den jembidang Sen-i, "BJP-i onok anema tim masüba nung central agencies amshir. NIA, ED aser CBI inyaksangshiba mapatem aser TMC lenirtem anema inyakba ya taaktsüka lir. Onoki EC dang yimtenren party ajaki kasa jenjang nung tokteptetsüsa inyakang ta mepishitsü," ta metetdakja liasü.

Trinamool Congress-isa, Lok Sabha election jakdang NIA aser BJP tsüngda memeshiba tesendaktep ka lir, ta tai tongloksü.

TMC-i X ajanga, "Asen democracy raksatsütsüsa linük temzüng alema inyakbaji onoki magizüktetsü aser item ama mapa nokdangtsü atema longjemer nokdaksü telemetba agiogo," ta metetdakja liasü.



April 08, 2024 nü Bankura district nung Lok Sabha election atema nüboyim sentong ka nung West Bengal Chief Minister aser TMC tongti lenir, Mamata Banerjee-i shilem agidang tangokba noksa nung angur.

SBI STATE BANK OF INDIA
Marketing & Communication Department
Local Head Office, Guwahati-6

AGENCIES/VENDORS EMPANELMENT
Assam, Arunachal Pradesh, Manipur, Meghalaya, Mizoram, Nagaland aser Tripura state tem nung Bank indang publicity works atema Vendor empanelment asoshi State Bank of India-i Expression of Interest (EOI) meshir. **Outdoor Publicity, Event Management, Designing and Printing of Flex/Banner, Producing Audio-Visuals, printing of Brochures/Leaflets/Posters/Journals, Advertising in print Media/Electronic Media** ama nung publicity works tsütsü mapa shia alir Agencies/Vendors jaoker. Temsüa aliba, telatetbatem aser temzüngtem den külemi application form ji Bank indang website "www.sbi.co.in" nung procurement news nungi download asütsü akok. Application tabensa den külemi nungdakba shiditemji sealed cover ka nung mapa balala category sasep nung **22.04.2024 anogo nikongdang 01.00 ako matongdangsa** tsünglanglen sign süa alir ket nung agüjang. Postal ajanga menoba mesüra tanga kuli balala ajanga menor anguba application magizütsü, aser ibaji Bank khuret masütsü. Lenla balala nung mabensaba applications magizütsü aser kuli kecha memetdaksü applicator agizütsü mesüra magizütsü mesüra applications ajak magizütsü Bank dak temeden lir. Mapa category balala atema Vendors-i temeja applications agütsütsüla.

Sd/-
Assistant General Manager
Marketing & Communication Department
SBI, LHO, Guwahati

Place : Guwahati
Date : 09.04.2024

Nuclear bomb agi amokmerener nisung ana Delhi airport nung apu

New Delhi, April 08 (Agencies): Nuclear bomb agi amokmerener nisung ana Delhi police-i Indira Gandhi International Airport nung puogo, ta Hombarnü ketdangsertemi metetdaksü.

April 5 nü Gujarat kübok Rajkot nung alir Jignesh Malani aser Kashyap Kumar Lalani na Ahmedabad-i aotsü atema tayimtsüi ayakettsü mapang nung security sepaitemi tena mita reprangbaji tenati ashishia liasü, ta police-i metetdaksü.

Airline official kati benokba FIR nung shia aliba agi, nisung ana jagi security staff dang, "Küna ket nung nuclear bomb bena lir. Nai kechi asütsü?" ta asüngdanga liasü.

Malani aser Lalani naji police-i apu, kechiyong tayimtsü aser passenger tem atema tenaji amokmeren liasü, ta police ketdangser kati metetdaksü.

Deputy Commissioner of Police (IGI Airport), Usha Rangani-i, bushisüngdangba ajanga Gujarat nungi nisung anaji construction sector ka nungi contractors liasü ta jangjaogo, ta metetdaksü.

"Tezüngzüktep ka agitsü atema tenati nisung ka ajurutsü asoshi Delhi kübok Dwarka-i arua liasü. Tena apuba sülen tenaprongla bail nung chiokogo saka maneni iba ken o bushisüngdangdar," ta DCP-isa metetdaksü.

Congress party-i sensakertem timtem onük sendoker: PM Modi

Bastar, April 08 (Agencies): Hombarnü Chhattisgarh state kübok Bastar nung Lok Sabha election atema nüboyim sentong ka nung jembidang Ato kilonser, Narendra Modi-i, Congress-i sensakertemi ajangshiba teblemtsü onüktem sendoker, ta aitsü.

Modi-isa, tesüiba küm ter tashi BJP-i aniba NDA sorkar pusemba atema state nüburtem dang pelaba lemsateptsü asoshi pai Bastar semdang, ta metetdaksü.

"Coronavirus wara mapang nung sensakertem koma asütsü? ta nüburtem shisabulua liasü saka NDA sorkari nüburtem nem angati ration aser angati vaccine agütsü," ta pai ashi.

"Linük nüchiso anguba sülen Congress-i ibaji linük nung auyatsü atema license anguba ama bilem, ajisüaka 2014 küm (NDA-i Centre nung sorkar akümba sülen) Modi-i iba license ji agientsüogo," ta Ato kilonserisa metetdaksü.

"Tesüiba küm 10 nung linüki kechi jenjang ajangzüktet?. Linük renlokba aser iba atemaji nenoki pusemba atema nenok dang pelaba lemsateptsü atema ni yagi aruogo. Nenoki yangi

(Chhattisgarh) BJP sorkar tentetba dang masü saka terenlok India tajemdakdaka tashi itshitsüogo," ta paisa ashi.

Modi-i, küm aika sülen India nung sorkar tashi tait ka yangertetogo aser NDA atema tongtibangtibaji sensakertem ajungkettsüba lir, ta ashi.

"Linük nüchiso anguba sülen küm aika Congress sorkari sensakertem nungdak balala sendoka liasü. Congress-i kodanga sensakertem atema mebilem aser parnok timtem mangateti liasü. Congress kibong nung takartemi osettsüset jenjang atuba tetezü mangateti liasü," ta pai ashi.

"Sensakertem shisabulua ajak magientsü tashi ni animesüngzütsü telemetba agiogo. Sensakertem atema sorkari scheme ka nung ka ta benok aser sensakertem nem parnok temeden agütsü. Sorkari item telemetba agia inyakba ajanga tangbo linük nung nisung crore 25 dak tema kanga sensak tia nungi anitetogo," ta paisa metetdaksü.

Congress manifesto nunggi Muslim league indang stamp lir, ta paisa aitsü.



TIR YIMYIM

YIMOBILEM (EDITORIAL)

DIMAPUR SANGTENNÜ, APRIL (RONGCHII) 08, 2024

Tiyazü oluluang ta sünüa ali !

Nagaland yimten nung tematiba menden tanabuba nung amensang, Deputy Chief Minister, Y.Patton-i taoba hopta nung parliamentary election nung People's Democratic Alliance (PDA) candidate Dr.Chumben Murry asoshi nüboyimba lokti senden ka nung jembidang, yimtak yimtsüng nung tatar yimsüsür, Goanbura aser Polling agent-temi yimer ajak tenüng nung vote enoktsütsüla ta metetdaksüba o ji tiyazü olulu jembiba ka dang liasüa ta südaksüner. Yimten nung yimsüsürtemji temzüng ozüng yanglurtem dang masü saka Nagaland tejak, Nagaland akhüm aser Nagaland kolok lir. Ajisüaka, tangar mashimalu aser memeteri kati masü saka Deputy Chief Minister kati election nüboyimba sentong ka nung yimtak tanishirtem dang election agiba anogo nung yimtaklirtem ajak alui odaktsür vote-jibo yimten yimsüsür aser Goanburatemi dang ajenang ta ajungshiba o jagi alima tsüngdang Nagaland tejak aser Nagaland akhüm menentsüogo. Iba ama kolok adenba yimsüsür kati yimsü asünung Nagaland nung temzüng ozüng shitak benshia otetdima ta bilemer. Ano, tebilemtsü tulubaji tang Nagaland Deputy Chief Minister-ji Home mnister lir, tetezü pa kübok temzüng ozüng tashi mangartem azüoktsü purtem lir. Ajisüaka, state nung Home minister kati nübortem nem vote meinokdaksüi parnok tenüng nung nisung kari dang ajenang ta ashiba o jagi Nagaland tejakleni onüseta moudaktsüi atsüitta ayur. Aji oda, election nüboyimba mapang nübortem dang pei yimten telok nukjidong aser candidate tangatetba indang metetdakja jembitsü melen linük temzüng ozüng raksatsü lenmang dang sayua jajara, Nagaland asoshiibo, ibaji alima tatem atong amai asütsü. Iba nisung yagibo tang dang masü saka tamalena state general election agiba mapang nunga linük nung ato kilonser peladakja Naga nungerbo Suppy department ajanga anguba relief jang dang 'Modi jang' ta shia pelatepa chiyonger ta lokti senden aika nung jembia jajaba angashiogo. Iba ama o angashirtemibo Nagaland ya refugee camp ama dang bilema alitsüa akok. Paisa ano lokti senden ka nungbo Israel lima ya Khristan lima ta ashiba angashiogo. Item ama shisatsü dang masü saka temeteta maliba leniri Nagaland anira Nagaland maintsü. Asenok tia majung, tanü asenoki shimtetba yimten lenirtemi nübortem nungdak reprangteta tagitsü o mejembir. Alemlibo meinyaktsütsü asüyonga Naga yimten tebilemtsü tatem kuma latettsütsü nangzüka jembi, tanübo telokang aika kumogo aser item teloktem jagi dena Naga yimten onük mejembir. Aji oda, Nagaland ajaklen lenmang tajungba kuma yanglur, Nagaland state agi kodanga electric light masepba yimti ka kuma yanglur, nübortem ajak mapa inyakba agi kazütsü mapanga mangutsüsa tensa mapang tajung ka bener arutsütsüsa sentong tajung yanglur, itemji jembia jajar masü saka proxy vote enoktsütsü ajungshia jajaba yimsüsürjibo tangsa anendaktsünüa bilemer. Ajisüaka, kudasütsü, ajia asenokisa shim, anungji pai junga inyakli asenok ajak nungsang asütsü saka tang amaji süoshiibo tajung asem, necktie-a mesü aser garia tajung nung amener saka pa kolak nung tokolok melira kechi sütsü ? Iba ama jembir dakjibo temulung melemer aser ozü lenira ta mesüner. Atangji, tangbo pai mekümdangi jembiba atema sasaba metetdaksüogo, ajisüaka sasaba kisüngji masü, nübortem dang taidok meshir peisasa yimsüsüba menden nungi alutsüa langa lir. Ajisüaka, paia sasaba metetdaksüba jagi paia proxy vote ajenang ta nübortem dang ashibaji tai liasü ta pasasa rajemogo ta bilemer. Ashiko, Deputy Chief minister-i proxy vote agütsütsü nübortem ajungshiba lokti senten sentongjia sarasademer-ang tenzüker alitsü. Ibaji khen asenok ajaki taroki ia bilemdangtsüla. Joko, amanga-amanga Tsüngrema mali ama asenoki sarasademer auyar aser sarasademer vote ayoker, proxy vote enoktsür aser tashiyim mapa inyaker. Aji oda, yashi tashibo proxy vote enoktsübaji tai liasü, anungji odiabo meinyak saka tangbo Deputy Chief minister-i dena proxy vote enokjang ta yimjak nung ashiba ya Nagaland kolak nung aliba tokolok nungi adokba o lir. Iba kolok jagi asenok anir !

OLEMSABANG

PRESCHOOL YA KOMA INYAKER: (How to run a preschool)

~ Apokla Ben

(Yashi adok nungi...)

Preschool nung ano itemi sayutsüla aser yamai inyaktsüla:

*Self-image or self worth

Koma sür tanur kaji yimya tajung nung aser pa jenjang tajung nung indaktsütsü?

Telangzúbaji – tanur shiaji tenüng tetta ajatsüla. Pa tajungba pa majungba ta kodanga mejembitsüla. Tanur o tanur tsüngda temetemdang. Tajungertem dang tejatet. Kodanga luja tejembi aser tebenshi. Parnok tenüng züludang alphabetical tatongi züluba amaji dang teti telemsa amshiang. Süoshi sentsü mesüra alphabetical tenüng order ji dang amshia mapa lemezükjang.

(Call them by names. No partiality. Do not compare. Do not call only the good ones. Never discriminate. Use Alphabetical grouping of their names, or by colors of dress, etc. Never group them by good or bad ones.)

* Learning to put things where they belong and in proper place

Merüka aser benteta ayutsü meji nung kechi nungi bena aru yangji bener oa yudakjang, oset temji tim tayudak ayutsü angazükdakjang (that teach them sense of order and movement, sense of cleanliness).

Movement – Walk, run, tip-toe, hop, jump, eat, chew, drink, sip.

Clothing – proper names of dress, garments for different occasions.

Color – conscious, how many basic colors, colors of specific objects.

Tila tanur sayudang mezüngbuba GMRC sayur. Aser ano Laishiba aser Yisu indang sayur. Item ajak ken nung atener. Tesayuba ajak ken aser tsüngsang agi sayur. Creative music and dance. Asenok taintem asoshia ya kanga dang nungdak lir. Tebui tetsüi metet nung dang tila tanur kaji sayutet. Aser aji Lanurtemia metettsüla. Na tain kumadoker kelenbo joko menuadokogo ta bilemtsü. Anungji na asoshi tang mapang ya shidak lir.

GMRC ya kechi, Good Manner Right Conduct. Yimya tajungtem aser Jaklaliro shidak aliba. Iba yagi nisung ka taküm yanglur. Anepdang ajurutepdang "Good Morning", anüngdang "Good Afternoon", ano nikongdang "Good evening" ta wish süiteper. Aser aji menürema ashidang koda pelar. Nisung ka den jembitepdang "Thank you" ta teti ashitsü koda tajung. Nai nisung kar disturb asür ama süra "Excuse me" ta shir ang süia aor, nai nisung kar jashitsü ama inyaksara "I am sorry" ta ashitsüla. Nisung kar ne dangi arudang "Welcome" ta ashir.

Tila tanur madang kodanga teyazü mejembitsüla. Tangar nungsen mejembitsüla. O tajung dang jembitsüla. Tsüngrem tenüngsang dang jembiang. Sarasadema sayuang. Ken tajung tenang. Asayamenü kanga tesü. Ochi dang jembiang. Nai kechi inyaker aji dang tanurjagi angazüker aser inyaker kechiaser aji dang pai angur. Tangatetba ano kangabo mekara.

Tila tanur ta asünung soli nungi küm 6 tashi. Infant asüdangyongi pa/la den jembia dang liang, tola semzüktsüdang "tola melendi ni?" ta, tsü chikotsüdang, temang malis süja anepaludang, chiyongtsü mapang, mejanga alitsü mapang, saakdang, mesodang mapang ajak nung pa/la den jembia dang inyaktsüla. Rasaa ashitsüla. Tila tanur kechiba aser kechi agi ajeper metettsüla. Kimai aotsü asünung "kimai aotsü renemdi" ta, "anü apur, tesangwa koda tajung" ta, "tanübo tsünglu arur anungji kimai moli ni" ta, "odi, oya, obuo, otsü" ta shia tanurji ajungdakjang.

Tila tanur ji yamaji timi anishira pa tain akümdang nüji nung aintsü aser tim leman nung jajatsü. Laishibai A. Shin 22:6 nung ashibaji yamaji atalokdaksütsü. GMRC ji ibaji lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Florida nung taoba mapang arasentsür kati nisung 200 baptitsü



Jenny Weaver

April 08, 2024: Tawa Florida nung aliba tziyimküm ka nung taoba mapang arasentsür kati nisung 200 dak tema tzi nung baptitsüogo.

Easter Sunday tekülem sentong dak sendakba nung nisung 200 dak tema bapti.

Jenny Weaver ya taoba mapang arasentsür liasü saka tesülen lai Yisu Khrista agizük.

La ya Core Group mentorship organization nung tongti lenir. Iba organization-i Clearwater Beach nung Easter tekülem sentong ayongzüka agi, aser iba sentong nungji Kibuba benjung agiba den külemi lai nisung 200 dak tema baptitsü.

Weaver-i la indang

Instagram account nung iba sentong agiba noksa aika lemsatep.

Lai Instagram ajanga, "Satan-i agia aliba tesem onoki tanaben meyipa agir," ta metetdaksü.

"Iba ya Laishiba nungji tapak kar mesüra film ka nungji agitetba ama liasü. Lokti tulu adenshia iba nungji Tsüngrem densema liasü. Nisung aika tzi nung bapti aser aikati ibaji kulisüa repranga liasü. Iba ya Tsüngremi inyakba mapa liasü," ta lai metetdaksü.

Kasa sentong nung adener, Esther Awaken Ministry nungji Samantha Virella-i, "Iba sentong ajanga ni aser ozü kibonga melenshitsüogo," ta

metetdaksü.

Laisa, "Linüktem nung asentenshi atema iba ya tetenzüker dang, ta ni amanger. Tsüngremi onok asentenshitsür. Tzi nungji ayateta adokba mapang nung onok dang taküm tasen aser Tsüngremer sentong indang nenshia metet," ta metetdaksü.

Weaver ya arasentsür ka liasü, la ya temesepba mozü achir ka liasü aser lenmang nung dang lia jaja. Lai Khrista agizükba sülen lai Core Group tenteta liasü.

Mezüngbo Core Group ya tetsürtem atema mentorship program ka dang liasü saka tangbo iba program nung tebur aser tanurtem-a züngoker.

Yaküm Cuba nung Khristan em anema inyakba tatalokba 622 liasü

April 08, 2024: 2021 küm July ita nung Cuba linük nung nüburtemi longkak ait tenzükba sülen linük nung Khristanem reshikangshi kanga bulua kümogo; 2023 küm kija nunga Khristanem anema inyakba tatalokba 622 liasü.

2022 küm nunga Cuba nung Khristanem anema inyakba tatalokba 657 liasü. 2021 küm nungbo Khristanem anema inyakba tatalokba 272 dang liasü, ta United Kingdom nung amenoka aliba melungtet telok Christian Solidarity Worldwide (CSW)-i metetdaksü.

CSW indang "Repression and resistance - a return to hardline tactics" report ajanga ashiba agi, ozüng yanglushiba aser meimchirtem temeden anema inyakba inakyimtem ajanga Afro-Cuban groups, Jehovahs' Witnesses, Protestant aser Roman Catholics Khristanem kanga timtemer.

2021 küm July 11 nü longkak ait tenzükba sülen nungji Cuba nung communist sorkari tamangba yimsü aser yimsü lenirtem nokdangtsü atema ozüng tesashi benoka inyaker.

Register süa aliba aser register masüba yimsü associations mita repranger, jaoka asüngdangyar aser mapatong balala nokdangtsü atema amokmerener.

"Timtemertem yaritsü meranger lenirtem aser Arogo züngsemtem apur, amokmerener, senchi achir aser teyari agütsütsü yua aliba ajakji apur," ta report nung shia lir.

School tem nung Khristan tanurtem mezüngmeshir aser register süa maliba teloktem nungji lenirtem amokmerener aser senchi achir, ta kasa report ajanga metetdaksü.

Khristan lenir kati CSW dang, "Ni parnok (sorkar ketdangsertem) dang ni Khristan ta ashi. Ni Tsüngrem dak amanger ka aser Khrista sülen anidaker ka ta ashi. Sorkar anema nokdakba nung ni densema mali saka Cuba tenzüktsü atema pastor tem longjemba pusemer ka ta ashi," ta metetdaksü.

"Ni parnok dang, nenoki kü dak kechi inyakdir inyakaka ni maneni Tenla kidangi aotsü ta ashi. Ni denomination balala nungji Khristanem ajak kasa züngshitsü aser communist süaka mesüaka senso tajung ka ama alitsü ta ashi," ta paisa metetdaksü.

2021 küm July ita nung Cuba nung nung meyrjang aika yimti lenmangtem nung adenshia sorkari rongsenkettzüng junga ketdang mesütetba, covid wara anema meinyaktetba aser

yimtenren temeden magütsüba atema sorkar anema longkak aita liasü.

Coronavirus wara mapang nung chiyungtsü, mozü aser nungdakba osettsüset balala agi kanga anüngba den külemi mapang talanglang light maruba atema Cuba tesem ajaklen nüburtemi sorkar anema longkak aita liasü.

Cuba nung Khristanem reshikangshir tamajungtibaji sorkar lir. Sorkari Khristanem ya Cuba Communist Party atema amokmeren ka ama züngshir, ta Khristan melungtet telok Open Doors-i metetdaksü.

Arogo lenirtem süaka züngsemtem süaka shirnoki yimtenren tsütsü ochimashi anema ola adokdir aser meimchir temeden anema inyakba anema ola adokdir sorkari parnokji pua asüngdangyar, senchi achir aser tepuokdak ayur.

Cuba nung aliba Tenla kitem nung tekülem sentongtem agiteter, ajisüaka Arogo lenir kar 'sorkar anemertem', ta melung meleme bilemra item Arogoji anentsür, ta Open Doors-i metetdaksü.

U.S. State Department-i Cuba ya "country of particular concern" (CPC) list nung züngoka lir.

ANOGO ABEN TSÜNGREM DEN

Taküm tzi talubosa

"Aser Pai kü dang ashi, item atalokba Ni Alfa aser Omega, Tetenzük aser Tatembang. Tsüraba nem Ni taküm tzi tziüpokdak angati dang agütsütsü".

J. Adok 21: 6.

Tebuji taküm tzi tziüpokdak. Kibuba Yisui Pa asüba aser shia aruba ajanga iba süngkümji lapoktsü. Tanela Temeshii iba ayong jagi anir aser ajemtsü aser tziura atemtsü ayonger.

Tziuraba pur ajak Yisui ajar, aser Pai Pei taküm ayong ka ama agütsür. Kari marok bener arur aser aji sünga bener aor. Kari tziüpong tulu bener arua sünga tatener. Kari arur, aser iba ayong nung temang ajak rema pungoker aser tasü maitertem arua pungoktsü ayonger.

Kari mesüra ajaki arua iba teperiba nungji ajemtsü akok, saka ishikati dang inyaker. Tziüpoktetdak anasa alirtemji dang peritsü akok. Kodang yima alur tzi timba akümer aser tenem temtsüng nung alir ajak peria ajemer aser nungdak ajak peridaksür. Kodang ayong tzi jagi lenden tongdir, ayongji tesatempa aser tuluba akümer, aser aika ajemer aser pei nungdak peridaksür. Yamaji Kibuba nungji adokbaji ishika, aika aser lokti asoshi talubosa lir.

Teburtemi aser tetsürtemi alima nung mulungsü bushir. Shi tepela, rongsen, aser temetetba bushi dang tanela nung tziura doktsür. Ajak tazüng arur aser mepelar. Kumtetdakba Khrista shibai kangki nung "ya renemogo" ta ashi, Pai ajak ajar. Pai tziutu ajak yima aoba ayong kümdaktsür. Ne takümjia yima aoba ayong kümdaktsütsü Pai ajar. Nai aji inyaksü mulunger asü?

Uttar Pradesh nung pastor ka dak azük

April 08, 2024: Tawa Uttar Pradesh state kübok Hospital-i anir oa yari.

Maharajanj district nung Osangbener den jembidang telok kati pastor ka dak kanga pastor kinüngtsüi, "Pa anogo mejungi azük; kinüngertemi pezünü hospital nung amongba police matsüngdang ken o ka sülen ni kidangi anir arua benokogo, ajisüaka tang tashi liasü," ta metetdaksü.

police-i kecha meinyaker. Doctor temi CT scan aser Jamui Kala yimdak nung X-ray agiba ajanga temang Pastor Shailesh Kumar den pa telung-a mejungi yiruba kinüngtsü Saroj aser arrshi jala jangjaogo; pa temang tajungba ka densema anasa aliba kümдар, ajisüaka temang meta-a shiranger, ta lai metetdaksü.

benjung ka nung adenba Pastor Kumar'er kibong mapang nung Hindu yimsü alia nung züngsem tenetji- Pastor Shailesh, pa kinüngtsü, jala ka, jagi arua timtem agütsü. tetsü o tebu na aser par adianu ana lir.

Iba sentong nungji pastor-i "Onok Arogo Tenla ki mali, tangartem Khristan yimsü ajisüaka kidang Khristanem dangi meyipdaksür, ta tai adenshia tekülem sentong tonglokja Hindu nungertem ayongzüka agia aruogo, jagi pastor dak azük tenzüka ajisüaka kanga reshikangshiba liasü. agi ita trok tejaklen tekülem Pastor Kumar tekolak sentong agibaji anena liasü. kanga mejungi yiru. Tenük anasa shi-long ka endok aser Onok aliba tesem nung house temang telung-a amena azük, fellowships ajak nokdangogo," ta pastor kinüngtsüisa ta pastor kinüngtsüisa metetdaksü. Iba tatalokba sülen pastor metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sülem

(n) Süngdong temerang tapu ka.
Iba dong nung Süsüp aser nati ninangi tzü ajemer. (oak tree)
* Sülem süng ya akhi British nungertemi yangluba lenmang tezülen meyr.

Sülen

(adj) ataloker külen, tejaklen masü (after)
* Putu aika sülen asenok rongnung yimsüsür adoker.

OLONG PAITEP # 6751

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S__ _i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meypa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6750 TELANGZÜBA

TIPIEN :

- 1. Tanga, 6. Wara,
- 7. Rajang, 9. Anük,
- 10. Jenjang, 11. Alar,
- 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.

AAP-i Assam Lok Sabha elections nung CAA atema tongti süa jembitsü



Guwahati, April 8, 2024

(Agencies): Aam Aadmi Party (AAP)-i Citizenship Amendment Act (CAA) anema noktaker aser Assam nung Lok Sabha election atema iba ya tongtipang tebilemtü lir ta AAP lennir Atishi Marlana-i ashi.

"Sorkari pei sensotem nem mapa aser ki magütsüteter anungji kechiba tanga linüktem nungi tangar anir arua khuret adokdaksünür? Assam nung

AAP-i Lok Sabha menden ana atema nüboyimba nung iba ya tongtipang onük ka asütsü" ta lai ashi.

Atishi ya Delhi nung education minister lir aser lai anogo asemnü atema Assam semdangi arua lir.

Lai Dibrugarh candidate Monoj Dhanowar aser Sonitpur candidate Rishiraj Kaundinya na atema nübo yimtsütsü.

AAP atema tang tongtipang

onükji süngolu nung mapa inyakertem indang taa asütsü kechiyong tanga state tem dang nungi tajemba lir. Delhi nung minimum wage teimtiba agütsür ta Atishi-isa metetdaksü.

AAP atema onüktem rongnung schools aser hospitals tajungba kümdaksütsü lir. Tesüiba küm ishika tsüngda Assam nung kaketshir ajemba nung ajemdaker sorkar school 8,000 jungnüa shibangtsüogo. School kanga majungba agi tazünger maliasü, ta Atishi-isa ashi.

Assam nung aliba mozü kitem nung doctor aser mozü ishika dang lir ta laisa ashi.

Assam nung BJP-i aniba sorkari scheme tasen kar metetdaksübaji elections nung rangloker sangdongba lir ta Atishi-isa metetdaksü.

"CM Himanta Biswa Sarma ya tang ang sorkar ketdangsütsü tashi anguba masü. Pai tetsürtem aser sensakertem atema inyaktsü bilema ali asübo inyakadoker lila" ta laisa ashi.

SIT-i APSC exam inspectors jaoka asüngdangya

Guwahati, April 8, 2024

(Agencies): Assam nung APSC ajanga mapa nung aniokba bushisüngdangba Special Investigation Team (SIT)-i Hombarnü examination inspectors 30 jaok.

Assam Public Service Commission (APSC) ajanga agiba CCE 2013 exams nung ashishitep adokba atema Justice BK Sarma-i report ka agütsüba sülen SIT ka tenteta

liasi. Tanü Inspectors- Bipul Gogoi, Abhijit Bora, Bhupendra Talukdar, Anjan Sharma aser Jyotiraj Pathak nunger Crime Investigation Department (CID) tsüngdangi arua liasi.

Parnoki ashishitep aliba answer sheets reprangshitsü. Taküm January ita Assam sorkari Gauhati high court tsüngdang APSC ken o indang affidavit ka agütsüba sülen SIT ka tenteta

Iba affidavit nung aija aliba ketdangsür pungu apuba aser ketdangsür 25 anentsüba shia liasi.

Maneni, Justice (ret'd) Bipul Kumar Sarma commission report nung ajemdaker ketdangsür 42 departmental inquiries agütsü.

CCE 2013-14 batch nung ketdangsür aika tim masüba inyakim ajanga mapa anguba atema bushisüngdanga arur.

BJP sorkari model code of conduct alema inyaker: Manipur Congress

Imphal, April 8, 2024

(Agencies): Manipur sorkari recruitment notifications sangdong agütsüba ajanga model code of conduct (MCC) tsüngdang aibelenogo ta Manipur Congress-i ashi.

Lok Sabha elections atema MCC tenzüka liaka social media nung co-operative inspector, LDC,

farm overseer, driver, peon aser chowkidar mapatem nung nisung anioktsüba sangdong balala agütsür ta Manipur Congress president K Meghachandra-i Manipur chief electoral officer (CEO) dangi shidi ka zülüogo.

Iba maparen atema employment exchanges ajanga form agütsütsü ashibaji MCC

tetuyuba alema lir ta Meghachandra-i ashi.

Iba dak sendakba nung April 2 nü shidi ka zülüuka tang tashi mapa kecha meinyak lir. Anungji Chief Electoral Officer-i item sangdong agütsüba ketdangsürtem dak ozüng tapet mapa inyaktsü ayongzüker ta Manipur Congress-isa metetdaksü.

NAI-A YA METETTER MA

JUJUTSU KAISEN
HIDDEN HISTORY PRESENTS THE

Alima nung "most in-demand animated TV show" ji JJJUTSU KAISEN lir. Iba show ajanga Guinness World Record ka nguogo aser ibaji "World's Most Popular Animated Show of 2023" lir.

STATE INSTITUTE OF HOTEL MANAGEMENT (SIHM) DIMAPUR, NAGALAND

HSRT Programme (Hunar Se Rozgar Tak)
Sponsored by Ministry of Tourism, Government of India

ACADEMIC YEAR 2024-25

1½ YEAR DIPLOMA COURSES
* Diploma in Food Production
* Diploma in Food & Beverage Service

3 YEAR B.Sc. In Hospitality and Hotel Administration

ELIGIBILITY
Candidates must have passed 10+2 exam from any stream for Diploma Courses.

ELIGIBILITY
Candidates must have passed 12th exam with minimum of 45% marks in aggregate in 10+2 system from a recognized board of any stream (Science / Arts / Commerce / Vocational).
The B.Sc. Programme which is recognized by Jawaharlal Nehru University (JNU), would award the final degree.

Assistance in assured placements in leading Hotels, Retail & FMCG

FOR MORE INFORMATION ON ALL COURSES CONTACT BELOW

+91 9233895656 contact@sihmdimapur.com Purana Bazaar B, Block 5, New Naga, Cemetery Road, Dimapur, -797116, Nagaland
03862-291117 www.sihmdimapur.com

SEATS WOULD BE AWARDED ON FIRST-CUM-FIRST BASIS.

Myanmar mitkar anemer temi arütsülen jila kar agiogo

Naypyidaw, Rongchii/April 08 (Agencies): Mitkari tashiyim amshia sorkar atsüngdokba anemer sepaitemi Myanmar anüdoklen Thailand den arütsü anasa Myawaddy jila amakba sülen mitkar temi iba tongtipang jila ya yutsür ao ama ajiteter.

Thailand tsütsü nungi nisung telok ka anir aotsü asoshi Naypyidaw nung aliba yimten yimsüsür temi tayimtsü aitdaksütsü asoshi Thailand dang temelaba asüngdangba sülen mitkar 67 aser non-commissioned officers 410 densema Myanmar nung 600 dak tema Thailand-i aitsü ata lir, ta Thai PBS ajanga Hombarnü ashi.

Karen National Union (KNU) indang armed wing Karen National Liberation Army nungi sepaitem aser People's Defence Force (PDF) nungi anti-coup fighters temi jila nung aliba military base agiogo ta KNU ajanga taoba mapanga shia liasü aser parnoki apuba/rakzükbä prangbong aser injang indang noksa tema lemsatepa liasü.

Myawaddy ya Thailand nung Mae Sot nungi arütsü nung lir aser shishilempaba lenmang tongtipang ka lir.

2021 küm February ita mitkar temi sorkar atsüngdokba sülen asendenshir raraka linük ana tsüngta iba lenmang amshia April 2023 aser March 2024 tsüngta sen billion \$1 dak tema indang shishilemba liasü aser Myawaddy akoksaba kanga jangja liasü, ta Human Rights Watch indang deputy Asia

director Phil Robertson-i ashi. "Ibai Myanmar military junta asoshi takoksa tulu lir. Thai-Burma border crossing trok rongnung ibai tulutiba aser tongtipangtiba lir," ta pai ashi. Taoba mapang Myanmar dang Burma ta jaa liasü.

Army chief Min Aung Hlaing-i aniba general temi election ajanga kumtetba Aung San Suu Kyi'er sorkar nungi 2021 küm February ita tashi rakzüka mepetmesü tulu adoka nisung meyirijang aika pei ki yutsür tesem balala nung prokshi aser ano million aika teyari nüngdaka akum.

Ano telungpur telok balala lungjemba Three Brotherhood Alliance ajanga northern Shan aser western Rakhine state tem nung taoba küm October ita tatemlen nungi rara tenzüka mitkar indang outpost noklang aika rakzükbä aser mitkartem tebilemtsü tulu ajuru.

Mitkartem tesem balala nung raratsüsa akum aser tayimtsü amshia amakba tali kumdaksü aser tashiyim amshia teburtem sepaitem nung anioktsü policy sangdong.

"Mitkartem kinük ka nung tsüngtena lir aser Myanmar nüburtemi maginüba rara ka raratar, shirnoki mitkar dictator yaritsü memulunger," ta Robertson-i ashi.

Mitkar temi atsüngdokba yimten yimsüsür temi kumtetba National Unity Government (NUG) ajanga taoba hopta ashiba agi, par sepaitemi Naypyidaw nung drone amshia amak, koba mitkar indang remote aser yimtiba lir.

KNU ya Myanmar nung ethnic armed group tejentiba aser mitkar temi sorkar atsüngdokba parnoki mezüng aitsü.

Parnoki PDFs züngsemtem nem training agütsür, koba NUG ajanga amenok.

SANGDONGER

Süngdong-lu ayimertem atema agüja aliba Nursery Farm nungi süngdong (Saplings) angutsü.

1. Pine (three types)
2. Kisamen (Kokon)

**SHIM KI MPCS,
Nursery Farm,**

Marepkong ward, Mokochung
Contact No: 9862127345

Mozambique nung rong ka meküpok, nisung 94 asü



Maputo, Rongchii/April 08 (Agencies): Mozambique north tsütsü tzükum anasa süng agi yangluba rong ka meküpokba sülen tanur densema nisung 94 aser 26 samar bushir, ta ketdangsür temi ashir.

Iba rong ya ango apuba rong ka liasü aser nisung belentsü temelaba meluasü, ta Mozambique indang Maritime Transport Institute (INTRASMAR) administrator Lourenco Machado-i Hombarnü television ajanga ashi.

"Deobarnü tzüyim nung lendong ka atalokba indang zülüoka liasü, kong nisung 130 bena aliba rong ka meküpokba nung nisung 94 asü. Onoki nisung tasümbang 94 ngutetogo

aser 26 samar bushir," ta pai ashi.

Iba rong ya Nampula province nung aliba Lunga nungi Island of Mozambique leni nisung bener aorba liasü aser bushisüngdangba mapang rong nungya tzüsem tesashi agi kongshiba amai ajiteter, ta pai ashi.

Iba rong nung mena alirtem ya timba cholera tashidak indang osang meshidak prokshiba tetsübo nung mainland nungi jena aotsü merangertem liasü, ta Nampula indang Secretary of State Jaime Neto-i ashi.

Passenger tem ya cholera tashidak poktetba nungi jena aorba liasü, ta ano maritime administrator kati state

broadcaster TVM dang ashi.

"Iba rong nung nisung tali mena liasü aser nisung aika abentsü metemsü asünung tzü telungi alu," ta Neto-i ashi aser asürtem rongnung tanura aika liasü ta ashi.

Social media X nung prokshiba video tem nunga nisung tasümbang aika tzükum nung yua aliba nguogo aser ano kari tanurtem tasümbang bener jaja liasü.

South Africa nung aliba Mozambique linük ya alima nung tesensaktoba linüktem rongnung ka lir, kong taoba küm October ita nungi tenzüka tzü nungi adokba tashidak agi menepba nisung 15,000 jungnüa aser tasüba 32 lir, ta sorkar ashir.

Nüngdakba oset balala bener truck 300 dak tema Gaza-i iogo

Jerusalem, Rongchii/April 8 (Agencies): Gaza nung alirtem nem teyari agütsütsü atema tenüngdakba oset aser chiyongtsü bener truck (gari tulu) 300 dak tema aiba Israel-i sangdongogo. Ita trok tejakdang iba tesem sabanga ayuba sülen tang khu balala bener gari timtiba Gaza-i iogo.

Ajisüaka Hombarnü bener aiba chiyongtsütem ya iba tesem nung aliba nübur million dak tema, shirnok timba refugee tem lir, parnok mesütsü asoshi tenüngdakba United Nations-i asateter aliba dang nungi kanga agi tajemba asütsü. Iba tesem nung nüburtem ayawara agi meneptsü ana nung lir.

Alima nung linüktemi nongshiba mapang ka nung Israel-i Hombarnü ashiba agi, teyari agütsütsü asoshi truck 322 asadangba sülen bomb agi kanga mejungi raksatsür aliba iba Palestine litsü yagi aitsü temelaba agütsüogo.

Israel indang Coordinator

of Government Activities in the Territories (COGAT)-i X ajanga ashiba agi, tata gari 322 rongnungi 228 koba shilem 70 shi asütsü, item garitem nung chiyongtsü bener liasü.

Al Jazeera-ia, Egypt den arrtsü nung aliba southern Rafah crossing ajanga gari kar aiba asadanga ataogo. Tanga garitem ya Karem Abu Salem crossing, koba dang Israel nungertemi Kerem Shalom ta ajar iba tesem ajanga ia liasü, ta Al Jazeera osangbener Tarek Abu Azzoum-i Rafah nungi metetdaksü.

Paisa, humanitarian convoy tem timba tzü, shini, am aser tanga tenüngdakba osettem bener liasü.

Ajisüaka anüolentip nungi aiba tata garitem ya ka danga Gaza anüdoklentipi aotsü memela, kong ayawara agi nüburtem meneper lir, ta US aser humanitarian teloktemi shiogo, ta paisa shisem.

Rafah nung crossing achaayangba ketdangsürtem

rongnungi osangbener kati Al Jazeera dang ashiba agi, Hombarnü teyari agütsüba ya rara metenzük tsüngda agüja aliba teyari shilem tila ka dang lir.

"Strip nung aliba nüburtem aser talisa anüdoklentip aser Gaza yimti nung alirtem ayawara agi menepogo. Anüolentip nunga timtem tekangshi aika ataloker lir, anungji iba amai teyari agütsüba ya teperi masü," ta Hisham Adwan-i ashi.

UN aid agency tem aser tanga humanitarian teloktemi ashiba agi, Gaza nem anogoshia humanitarian aid aser commercial goods tem truck 500 nungi 600 agütsütsü nüngdaker, ajita asünungdang tensa junga akümtsü.

Ken o asadangba sülen Gaza teyongtsü aser anüdoklentip nungi jenshia aoba nisung million 1.5 shi tang anüoletip nung amenoka aliba Rafah yimti nung jenoka lir aser Israel-i maneni Gaza

amakba mapang ka nung Refugée Aid organization tekolakba Sean Carroll-i ashiba agi, anogoshi teyari agütsüba ya tang agüja aliba dang nung tali asütsüla aser agency tem Gaza-i aiba mapang parnok nem tekümbakba agütsütsü ta Israel-i tenangzükbä ka magütsürteter.

"Nüburtem taküm liyonga aotsü atema chiyongtsü aser tanga tenüngdakba osetem agi peridaksütsü asoshi anogoshia truck 500 dak temabosa aitsü nüngdaker," ta pai Al Jazeera dang ashi.

"Ken o tongtibangbaji shirnoki item teyaritem ya agütsütsü," ta pai asüngdangba den, UNRWA aser Palestine nungertem tem atema UN relief agency, Gaza anüdoklentip-i teyari bener otsütsü memelar.

World Central Kitchen staff tem densema lendong tulu ajangshiba sülen humanitarian workers tem Gaza nung mapa inyaksü atema tsübuteper, ta paisa shisem.

American Near East

4buba Lt. G. Rio Memorial asayamung Dimapur-i kokogo



Dimapur, Rongchii/April 8 (TYO): Hombarnü 4buba Late G. Rio Memorial Men's U19 Inter-District Tournament final Dimapur aser Niuland na asayaba Dimapur team-i koka iba asayamung asemenbuba atonga kokogo.

Final asaya nung mezüing batting amenba sülen Niuland team-i over 41.1 nung asayar ajak out sür run 133 yanglua liasü. Asaya nung Niuland team-i junga masayatet aser mapangshia asayatem out süa liasü. Parnok rongnungi Kundan-i run 33, Pawan-i out mesüi run 21 aser Kumar-i run 17 yanglua liasü.

Dimapur team bowler tem rongnungi Dipu-i wicket 3, Samir aser Sundaram nati wicket 2 aser Deepak, Medempok Pongen aser Raj nungeri wicket kaka agia liasü.

Asaya akoktsü atema run 134 nungdaka batting amenba mapang Dimapur team nungi opener Dipu (21 runs) aser Anirudh (44 runs) nati asaya kanga junga tenzüik aser asaya yakta tematoktsü ama bilema liasü. Ajisüaka Niuland team bowler temi asayar ana ya out süja liasü. Iba sülen Shyerinlo (29 runs) aser Samir Ali (20 runs) nati süngjemshir team tejakdangi ani, saka Shyerinlo-

a Jatin-i out süja liasü.

Asaya akoktsü atema run 6 nungdaka wicket 5 anunger aliba mapang Samir Ali-a six azüiktsü merangba mapang out süatok. Maneni run 6 nungdaka aliba mapang Dimapur team nungi asayar asem kanga atonga out süadok aser mapang ka nungbo Niuland team-i asaya akoktsü ta bilema aliba mapang Deepak aser Medempok nati kanga süngjema asaya Dimapur team takok dangi ania liasü.


Champions: Dimapur

Runners Up: Niuland

Man of the Match (Final):

Dipu (Dimapur)

BAC: Sindhu & Sen nati anir India nunger asayatem asayatsü



Rongchii/April 8, 2024 (Agencies): Badminton Asia Championships nung PV Sindhu densema India nunger asayatem takok angutsü atema asaya tasak kar ajangeta aotsü asoshi renema lir. Iba asayamung atema qualifiers Mongolbarnü Ningbo (China) nung tenzüiktsü.

Ajisüaka iba asayamung nung world No. 1 tarep aser defending champions Satwiksairaj Rankireddy aser Chirag Shetty na masayatsü asoshi telemtetba agiogo.

Iba asayamung ya Olympic qualification ranking points angutsü atema asayamung tongtibangtem rongnung tatemangbuba lir, anungji asayar aika asoshi kanga tongtibang lir.

Sindhu yiruba ajanga mapang talangka junga masayateti arur tawa tera tajungba asaya arudar aser la mezüingbuba round nung world

No. 33 Malaysia tsür Goh Jin Wei den asayatsü. BAC nung tetsür asayatem rongnung top seed An Seyoung, Olympic champion Chen Yufei, Tai Tzu-Ying, Akane Yamaguchi aser He Bingjiao nunger ajak densema lir.

Tetsür kija asaya nung ano Aakarshi Kashyap-a asayatsü, aser la Thailand tsür Busanan Ongbamrunphan den mezüingbuba asayatsü.

Tebur kija asaya nung Lakshya Sen, shiba French Open aser All England Championships nung semifinal tonga asayaogo, pa Paris atema qualify tasürdang lir. Sen mezüingbuba round nung top seed China nunger asayar Shi Yu Qi den asayatsü.

Teburtem rongnung ano HS Prannoy mezüingbuba round nung China nunger asayar Lu Guang Zu den asayatsü. Pa taküm junga masayateti arudar aser pai taoba mapanga Zu den

junga masayateti asemenbo tamakok nguogo.

World No. 27 Kidambi Srikanth, shiba Paris Olympics atema qualify mesütet pa world No. 3 aser second seed Anthony Ginting den mezüing asayatsü.

Maneni Priyanshu Rajawat mezüingbuba round nung Malaysia nunger Lee Zii Jia den asayatsü.

Tebur tarep asaya nung MR Arjun aser Dhruv Kapila na China nunger tarep Liu Yu Chen o Ou Xuan Yi na den asayatsü aser Krishna Prasad Garaga o Sai Pratheek K nata asayaba angutsü.

Tetsür tarep asaya nung Tanisha Crasto aser Ashwini Ponnappa na Indonesia tsür Febriana Dwipuji Kusuma aser Amallia Cahaya Pratiwi na den aser Treesa Jolly o Gayatri Gopichand na China tsür Liu Sheng Shu aser Tan Ning na den asayatsü.

Hockey India-i training atema asayar 33 shimogo

Rongchii/April 8, 2024 (Agencies): Hockey India-i Hombarnü India hockey team atema asayar 33 shimogo aser item asayatem ya SAI Bangalore nung May 16 nü tashi maneni training agitsü.

Asayar 60 agi kümtetba assessment squad ka April 1 nü nungi camp tenzüik aser April 6 aser 7 nü selection trail agia liasü.

Tang shimba aliba team nung yagi India team shimtsü, shirnok tarutsü nung coaching camp aser international exposure tour tem nung shilem agitsü. India tetsür hockey team taküm küm tatemlen FIH Hockey Pro League 2023/24 nung Argentina, Belgium, Germany, aser Great Britain den asayatsü atema Antwerp-i aotsü.

Hockey India High Performance Director Herman Kruis-i core group tasenba dak timla akaba lemsatepogo. "Linük kübok tesem balala nungi hockey asayatem anidena taoba hopta 14buba Hockey India Senior Women's National Championship asayaogo aser

iba mapang coach aser asayar shimertemi asayar 33 shimogo aser item asayatem dak India tetsür hockey team tejakdangi anir aotsü timla akar. Tang team tajung ka shimogo aser item asayatem yagi linük tenüng nung taruba international tours aser FIH Hockey Pro League 2023/24 nung shilem agitsü," ta pai ashi.

Team:

Goalkeepers: Savita, Bichu Devi Kharibam, Bansari Solanki, Madhuri Kindo

Defenders: Nikki Pradhan, Udita, Ishika Chaudhary, Monika, Ropni Kumari, Mahima Chaudhary, Jyoti Chhattri, Preeti

Midfielders: Salima Tete, Marina Lalramnghaki, Vaishnavi Vitthal Phalke, Neha, Jyoti, Edula Jyoti, Baljeet Kaur, Manisha Chauhan, Akshata Abaso Dhekale, Ajmina Kujur, Nisha

Forwards: Mumtaz Khan, Lalremsiami, Sangita Kumari, Deepika, Sharmila Devi, Navneet Kaur, Deepika Soreng, Preeti Dubey, Vandana Katariya, Rutuja Dadaso Pisal.

Danielle Collins-i WTA Charleston Open kokogo



Rongchii/April 8, 2024 (Agencies): America tsür tennis asayar Danielle Collins-i Deobarnü WTA Charleston Open clay court title benogo.

Final asaya nung lai Russia tsür Daria Kasatkina 6-2, 6-1 agi ayong ayonga koka liasü. Hopta ka tejakdang Miami Open 1000 nung otsüsütsüsa takok anguba sülen lai tang iba asayamung kokogo aser iba ajanga la world ranking nung jenjang 15bubai tuogo, koba la indang career nung tang tashi nung jenjang tajungtiba asütsü.

La iba season tembangba sülen asaya nungi anentsü ta sangdonger liaka arishi küm 30 tain Collins-i la indang career nung tang tajungtiba asaya arudar aser la asaya 13 tashi khen danga tamakok mongui asaya arudar.

2017 Charleston asayamung koker alila Kasatkina den final asayaba mapang Collins-i asaya

amokbanger asaya aser lai minute 77 nung dang asaya koka liasü.

"Ni ni jangraba ama asayatetsüsa maotsüba atema kanga pelar," ta asaya akokba sülen Collins-i ashi.

Asaya nung Collins-i lai teti asayaba ama kanga tashi ita asaya aser serve points shilem 95.2 akokba den break points ana tashi kümzüka asaya liasü. Lai tawa kanga junga asaya aruba ya taoba asayamung ana nung asaya 28 nung set ana nung dang tamakok anguba ajanga kuli agütsür.

Serena Williams-i 2013 küm Miami aser Charleston na prongla akokba sülen Collins ya asayamung anaprongla akokba mezüingbuba asayar kümogo.

Lai taküm asayamung balala nung asaya 22 tashi koka lir aser la world number one Iga Swiatek aser fourth-ranked Elena Rybakina nunger den jenjang kasa kümogo.

BILEMDANGANG

"Tamakok ajak ya takok nung shilem ka lir."